

抱
冲
齋
詩
集

道光二十八年正月十四日

奉

上諭駐藏大臣斌良由司員
洊陟卿貳供職克勤經朕
簡放駐藏大臣到任未久

遽聞溘逝殊堪軫惜著加
恩照都統例賜卹准其入
城治喪所有任內處分悉
予開復應得卹典該衙門
查例具奏欽此

皇帝諭祭病故原任駐藏大
臣斌良之靈曰鞠躬盡瘁
臣子之芳蹤賜卹報勤國
家之盛典爾斌良性行純
良才能稱職方冀遐齡忽

聞長逝朕用悼焉特頒祭
典以慰幽魂嗚呼寵錫重
壚庶沐匪躬之報名垂信
史聿昭不朽之榮爾如有
知尙克歆享

序

嘉慶甲子鐵冶亭師采輯長白諸公之詩爲熙朝雅頌集命元刊刻於浙江並撰跋語於後洵藝林之盛事矣惟其書之卷軸雖蔚然大觀然皆以眾作者之鉅製鴻章會萃成帙而連編累牘出自一手者則亦不多觀也笠耕少寇以名家貴蔭元嘉慶初與尊甫達齋尙書同官杭州少寇績學能文而詩才更爲宏偉元幕中名士亦多交好早許爲一代偉人道光丙午秋以所著抱冲集八帙寄示蓋己亥歲已有棣萼聯輝等集庚子歲有寶殿延恩等集嘉慶閒少寇隨托文恪公出征滑臺邪賊賞戴花翎辛丑歲有鏡海波澄等集甲辰歲有亮工懋績等集凡六年之中得詩二十六集集各爲卷己令閱者目不給賞其詩篇之美富必倍徙於所見八帙可知而乙巳以後所作者

尙不與焉然則彙前後諸集而言之他日有繼治亭師之志而
續輯雅頌集者焉得不推爲一大家哉憶昔與達齋尙書同
官有芙蓉樓餞別詩卷閱今五十年少寇之德業勲猷久已望
隆中外猶復不忘故舊以大集屬序今閱其集中佳句五言如
坐先春閣云梅矮花飛白鑑深火蘊紅曉起筠谷散步云吟風
蟬自逸得食雀還馴下直聞蟬云翠潑檐身雨涼傳殿角風消
渴云微吟情自適貪讀目常昏游園通巷云殿圯鐘魚寂林深
鳥雀稠鐘敲沈蔓草水涵膾空潭秋涼云秋爽涼多味衾香夢
有情七言佳句如晚至廣慧寺贈明安長老云窗外高松容我
傲市頭佳釀比師醕慶達泉野墅延秋閣小憩云逸致高於雲
際鶴宦情閒似水邊鷗喜晴云鳳子穿花輕似燕魚苗攢藻細
於蠶和曹良甫比部遣懷云宦情漫比溪雲淡詩思都如塢竹

深秋夜頤神養壽堂偶題云明月悄窺千里夢秋風催動五湖
心廈門書事云未見杲卿身敵愾徒聞趙括口談兵鎮海書事
云漫猜王琇剽崇島密構盧循犯大瀛詩中對偶雙聲疊韻亦
處處雅飭可稱作家也道光丙午秋頤性老人八十三叟揚州
年世弟阮元譔

序

曩予官司農與笠耕少司寇共事最久見其器識遠大才猷卓
犖而要歸於中正和平蓋得力於稽古者深矣及爲監司擢廉
訪入佐秋卿敷歷中外政聲卓然而於案牘之暇尤工吟咏近
出其所著抱冲齋全集及壺蘭山館詩草予受而讀之其用思
竅然而深其結體竄然而高其選言粹然一出於爾雅信乎怪
瑋奇傑之才有出之而無盡者昔王筠自撰其文章以一官爲
一集凡一百卷行於世其論家門集云世稱安平崔氏汝南應
氏並累葉有文才然未有七葉之中名德重光爵位相繼人人
有集如吾門者也予視學浙江嘗讀尊甫尙書公全集不勝
服膺今觀於此益知淵源家學與元禮而並美矣因爲綴數語
於簡端道光丙午先立夏三日治愚弟潘世恩拜序

序

昔人論史有才學識三長惟詩亦然才不大則無以牢籠百態
辨雕萬物學不博則無以囊括古今鼓吹羣籍識不精則無以
翦截浮辭芟夷煩亂蓋必三者備而後雄深雅健其言有物卓
然爲一時詩人之傑誠不易觀也我友笠耕太僕生有異稟承
達齋尙書家學自髫年卽工爲詩迨含香粉署出使戎旃以
及觀察魯吳持憲秦豫所歷之境旣多其詩格亦變而愈上蓋
大約胎息少陵而參以王孟之高超緯以韓蘇之渾灝大或干
言少至數語而皆有性靈卷軸貫注其中其氣澄然以清其詞
粹然以潔其光油然以長而縱橫離合變化萬端則亦如雲霞
光景之不可方物嗚呼至矣夫世之言詩者或襲積以爲才或
纖佻以爲巧而其實九能未辨六甲未窺繁聲曼詞東塗西抹

而自以爲獨出機杼抗衡古人其不令人掩口盧胡也幾希今
笠耕之詩乃合古人之詩以爲詩而才之雄學之富識之卓自
有以拔奇於古人之外洵非世俗言詩者所可望其項背也余
與笠耕累世交舊曩從戎魏博得與君共事鞍馬間泊來京師
君方直秋曹過從益密知君之肆力於詩者厥功甚峻而襟懷
之曠抱負之宏幹濟之長性情之厚皆於此可見蓋余交海內
詩人徧天下而如君之卓犖恢奇堪以信今傳後者卒難其人
非才學識之兼擅而毅然不逐時趨者曷能臻此此余所以讀
抱冲齋詩集而不能已於言也至君之歷仕中外勲績爛然諸
昆季聯翩鵲起家聲大闢他日躋台袞而矢卷阿所以鳴
國家之盛者又烏能量其所至哉是爲序歸安愚弟葉紹本拜

序

予束髮卽習爲詩顧獨深嗜蘇李十九首陶公正字曲江王孟
韋柳徐昌穀高子業十數家以爲清微閒遠淡而彌旨此太羹
元酒天下之至味也每不自揆有所作以此十數家爲準的雖
萬分不能得其一二而好之日篤爲之日益力沈酣浸漬至夢
寐不能忘長而伏讀當代名公之詩則色然駭舌擣而不下見
其矜奇炫博珠玉瓦礫雜然錯陳而又巧言如簧取古人所不
肯而沾沾自喜爲得未曾有竊復不能自堅疑先入者爲主生
平所深嗜前十數家皆非耶乃雜取漢魏六朝四唐至於明旁
及五代宋遼金元之詩兼綜而博觀之其中才力博大變化無
方如陳思阮左康樂明遠李杜韓蘇黃遺山道園青邱李何王
李諸巨手皆與今名公所爲判若黑白於是大惑不解如墮雲

霧中如適莽蒼者之不能辨南北也如是者四十年道光癸未由蘇臬入爲太僕卿與笠耕先生同寮日夕聞其緒論又讀其所作抱沖齋詩集有深契焉蓋先生幼卽攻陶韋中年肆力於學取裁富有吐納宏深合清微間遠博大變化兩宗爲一家故其詩有令人震眩者有令人斂襟微吟詠歎淫泆而不能自己者其必傳於後無疑至是乃恍然余向者所見之固而今名公之矜奇炫博荒唐而不軌於正爲非也顧余老矣髮種種而精銷亡學殖日以荒落心知之而力不能赴徒自悔領悟之遲而長抱此區區之意以終老也可慨也夫道光四年歲在甲申二月愚弟淮東陳廷桂謹序

序

蚤歲相逢幸識騷壇之主下風願拜遂爲吟社之師誌心服以
非阿欲力追而弗逮蓋名山著作自有千秋而一代縱橫更無
餘子矣如我笠耕老夫子華戟高門青箱世學吟咏外無佗嗜
好俯仰間有真性情當其走馬裁成雕龍撰出江文通贈以彩
筆李長吉如其天才固已譽擅無雙名標獨秀者也屬以節署
晨昏明湖燕賞翩翩公子共羨風流落落才人無嫌豪氣疎也
中髻寫學文字多緣天假遭逢時親陪從弄筆偶成其攄寫點
金偏許以陶鎔一見傾心終身北面梅花詩句改一字者卽是
賢師聲價品題增十倍者遽成佳士風塵特識感恩在知遇之
先衣鉢相傳結契在科名而外每懷雪泥鴻爪判宦跡以卅年
何期玉律金繩覩集成夫一品伏念我夫子敷歷勳名壯游車

馬於山見泰岱華嵩之大於水觀江淮河漢之深皇華奉使宣
其勤繡衣直指奏其績戎旃夜宿夢刁斗之森嚴關塞秋巡聽
牧馬之吟嘯且以掖垣靜鎮蕭寺清游聯問衣待漏之班陪賞
花釣魚之宴凡茲閱歷都供詩料於奚囊每有詠題輒重時名
於洛紙噪傳寰宇譽滿公卿洵壽世之無慙比立言而不朽珠
自維譴陋幸託龍門辱荷栽培願攀驥尾用是謹成敘引竊滌
淵源若夫目眩神奇心驚變化其體如雲霞之不可方物其才
如大水之浩無津涯固知李杜文章長吐光芒於萬丈奚啻春
秋史筆莫贊游夏之一辭受業鄭祖琛拜譔

序

僕與笠耕昆季交三十餘年矣辛酉春計偕來京師假館聖公
賜第與笠耕居衡宇相望因遂昕夕過從無間笠耕年甫及冠
翩翩佳公子絃琴讀畫相得極歡間作爲詩歌而未知其工於
此道也笠耕緣恩蔭爲農曹長出督江南漕陳臬陝豫皆有聲
僕時持節閩粵間宦迹相左意其一行作吏此事遂廢及笠耕
以同鄉內召僕亦橐筆左掖偶出一篇相質精深華妙直追古
人始服其功力之專且勤若此盡讀舊作亡慮數千首模山範
水指事類情幾于無體不備蓋昌黎所謂氣盛則言之短長與
聲之高下皆宜者僕老矣舊學日益荒落輒復望洋驚歎而笠
耕方以盛年精進不已一官一集著述等身未易測其所至今
笠耕襟懷落寞浮沈郎署近十年矣殆欲昌其詩耶抑昌其身

耶爲識數言歸之請試下一轉語云道光庚寅初夏復葺陳嵩
慶識於與鷗爲客之齋

重鐫抱沖齋詩集序

國家久道化成

文治與武功並赫

列朝

御製詩文集星輝雲爛震古鑠今一時喬木世臣名卿鉅子莫不制詩絃頌炳焉與三代同風嘉慶初鐵冶亭尙書選長白山詩

賜名熙朝雅頌奉

詔刊行彬彬乎簪作之淵海也迄今餘七十年作者代興後先相望今星陔承宣重鐫其尊甫少司寇笠耕先生之抱沖齋集七十一卷計分三十六集爲詩五千五百九十有奇末附眠琴仙館詞一卷既汔工命元度序其巔末謹案先生姓瓜爾佳

氏爲開國元勳信勇公諱費英東之族裔從

龍豐鎬世毓偉人先生之叔祖吳勤毅公 尊考達齋尙書並
敷歷兼圻爲疊臣之圭臬先生與介弟燕山相國崧亭中丞遠
亭觀察同時競爽有跗萼聯珠之盛蓋自農曹郎觀察齊魯吳
會提刑秦豫入爲同卿陟大銀臺擢憲副遷少司寇授駐藏大
臣卒於官未嘗一日不爲詩效王筠故事以一官爲一集故篇
什之富且精若此可謂盛矣昔歐陽公謂詩人少達而多窮且
必窮者而後工竊疑其說之偏非竺論也古詩人若皋陶廣虞
奚斯頌魯以及矢卷阿之音陳七月之戒若周文公召康公召
穆公暨尹吉甫家父凡伯衛武公之徒身爲公侯卿大夫富貴
壽考其詩列諸典謨風雅後世尊之爲經豈與郊寒島瘦者流
窮老盡氣爭一韻之工者同年語哉先生以金張之門望工爲

鮑謝王孟之辭弼中彪外屹雅揚風和其聲以鳴

國家之盛固當與會昌一品集並傳王筠蓋不足道矣先生詩初鏤於袁浦官署爲詰弟遠亭所編次阮文達潘文恭葉筠潭陳荔峰鄭夢白諸公既評隲而序之故不更贅一辭而第紀重鏤之歲月異日有續

熙朝雅頌集者論次嘉道兩朝諸詩人計必以先生爲大宗哉光緒五年歲次己卯七月既望平江後學李元度謹序

抱冲齋詩集序

道光乙未歲彝珍以試禮部畱滯京師得識笠耕少寇時少寇方闢澹園中構欣對軒有古榆八九株匝其三面濃陰鬱然偏西疊石爲小山上建話山亭以供展矚西山眾皴爭陳於前少寇是時官讀學多清暇常集葉筠塘鴻臚彭春農學士吳蘭雪刺史觴詠其中予亦數數與焉嗣予歸臥山中十餘稔及再來都下而少寇已奉使藏衛卒於其所其向所與燕游諸君子亦相繼凋亡每往經澹園之側孑然四顧輒低徊嘆者久之茲星陔方伯持其抱冲齋遺集屬爲序展讀數四猶想見四十年前宇內乂安 朝廷無事名公卿容與翰墨每值退直之暇相與飛觴角韻爲歡極一時文讌之盛不才亦何幸得與其間及今回憶之邈焉已成往事不能無少慨於懷也至少寇之詩之

工清新華贈莫名一體諸公序已備言之無事贅言爲也武陵
楊彝珍序

抱沖齋詩集後序

昔亞聖尙論古人而發其端於頌詩卽申之以論世後之學者奉爲圭臬以誦前賢所爲詩而又上下古今廣蒐博采於箋註而外編輯年譜焉譜者何卽論世之據也惟詩與年譜並行凡作者之於君親昆友與夫遭逢之榮悴仕宦之升沈悉能設身處地而尋繹之始知其詩非苟爲炳炳烺烺者而詩旣名家譜皆紀實矣

抱沖齋詩集爲滿洲原任駐藏大臣

晉贈都統瓜爾佳哈拉

斌笠耕先生之所作也 先生起家 恩蔭數厯中外四十餘

年大都官爲一集有一官至數集者則視所莅之久暫得詩之多寡焉其名集以官者似仿初白老人敬業堂體例云謹案

公於嘉慶初年隨侍武林繼回京赴試一薦不售遽補官尋從戎滑臺

簡放山東兗沂曹濟道復改官江左未踰年補授蘇松糧道督輸凡四年

擢陝臬俄調河南是爲公壯年自奉

旨入京至同卿蘭臺爲中年自少司寇至綏服藏衛爲晚年此公詩境之大凡也綜其應官京雒巡覽外臺凡勝地名區雖爲前賢所題及而訪名僧於蘭若撫古樹於巖坳往往突過前人足以信今傳後至於三使均齊兩番隨轍兩番

賜奠所歷各地方尙有國初高澹人諸先生隨

蹕經行之處若夫後藏地處天西去打箭鑪尙五十餘站公從容持節慷慨西行自正月杪至孟秋中浣始達任所視坡公

之謫居儋耳殆倍徙焉且雅州以外不惟古詩人所未到實古
詩人所未聞 公按轡馳征遇山水陡絕雨雪雰雰以及川湧
祥虹海驪異獸綏黃教馭蕃夷悉以詩紀之 公於是集有天
或昌我詩故使勞我躬二語殆自道歟觀其推闡忠孝篤懷友
于重師友之情文憫災黎之蕩析與夫采風問俗蒐古訪碑紹
詞學於秦_{游少}姜_{白石}參法書於趙董則又可得而言焉_{詳後詩說}以道
光丁未十二月薨於位事聞

宣廟悼惜

賜祭葬追贈如儀年譜爲 介弟法可庵先生所編 先生時
官江南河庫道集版卽刊於官舍事在己酉年同治十三年
崇星陔方伯陳臬湘南踰年

晉擢方伯是爲

公三令君光緒三年

_桂

檄綰綰局適有友人

由京攜是集並漚羅盦集投方伯者桂得請而畱讀焉凡集中字畫偏旁小有舛誤者隨讀隨籤年餘得若干條簽於副本呈覆方伯命付剞劂即畱詩板於湘垣於戲公之詩至是始昌矣昔蘇文忠公年譜經文定公手訂凡事有涉於詩者即以公詩證之遂與詩集並行可庵先生之訂公年譜即緣此例誦公詩者合年譜而參觀焉於公之亮節清風孝思忠悃既獲師資而殫見洽聞徵文考獻尤足以充學識焉光緒戊寅嘉平月鄉後學廷桂謹序

參校姓氏

歸安孫衍慶

柳君

清河陳元煥

芷庭

新建杜棻

蘭椒

鍾祥胡志章

稚楓

成都安樹森

青居

懷寧方

朔

小東

桐城汪

瀛

翰仙

重校姓氏

武甯劉鎮定夫

嘉定張修府東墅

南城余士穀季佩

長白廷桂芳宇

錢塘連自華書樵

長沙省城

志書局刊

抱冲齋詩集總目

起嘉慶己未春訖道光丁未秋

第一

南行北歸集一卷

自己未春至辛酉冬

起春日幽居至除夕止一百十三首

第二

司馭觀政集一卷

自壬戌春至丁卯秋

起自嘲至寄吳澗菴七十韻止八十五首

第三

左民使濬集一卷

自丁卯秋至是年冬

起新晴至和吳侍御典試之江止四十四首

第四

望雲陟岵集二卷

自戊辰春至己巳春

一起得塞外家書至放言止七十四首

二起迎省家大人至過汾陽王里止四十五首

第五

版曹靖共集一卷

自辛未夏至癸酉秋

起繼勇侯挽詞至偕人遊天甯寺止一百零九首

第六

渭邑從戎集一卷

自癸酉秋至甲戌秋

起過南樂縣

至重陽遊翠微山

止四十一首

第七

齊魯按部集三卷

自甲戌冬至丁丑春

一起奉命赴山左

至曹南道中

止八十二首

二一起病起赴任城

至西齋晏坐

止六十四首

三一起新正至濟甯

至暮春紅花埠

止七十二首

第八

江南量移集三卷

自丁丑春至是年秋

一起春暮過宿遷

至偶成

止七十七首

二一起金陵途中

至登翠微亭

止七十八首

三一起贈冷茂才

至聞門放舟

止八十六首

第九

句吳轉漕集九卷

自丁丑冬至庚辰夏

一起履任虞山

至抵潁野關感賦

止八十六首

二起崑山道中至淇園小閣三楹止七十七首

三起初入東魯境至畱題澹園止七十八首

四起晚出朝陽門至王氏林亭偶成止七十四首

五起東昌道中至題王石谷畫冊止七十三首

六起晚抵匯澤牖至書鐙止六十八首

七起雲物至得朱西生茂才綴書止九十五首

八起楊村夜至重遊破山寺止七十一首

九起胥江放舟至芥園旁佛院止八十首

第十陝豫秉臬集二卷自庚辰秋至辛巳冬

一起陳臬西陝至北相公廨止五十七首

二起過史村驛至岳廟恩恩小憩止九十三首

第十一澹園退思集一卷自辛巳冬至壬午春

起自豫還家閒居至崇效寺遇吳蘭雪止八十一首

第十二天閑勤字集五卷自壬午夏至甲申夏

一起補太僕寺少卿至游釣魚臺止九十三首

二起修葺澹園書齋至白衣庵古柏止九十首

三起新葺涉趣園至醉後雜題止九十一首

四起補竹至小集水琴山畫齋止八十九首

五起香蘇山館和昌黎至奏派查馬止八十二首

第十三開平考收集一卷自甲申夏至仲夏

起奉命查驗馬匹至晚次清河止一百零八首

第十四青海紀行集三卷自甲申秋至乙酉春

一起奉命青海致祭至寺坡底買茶止七十九首

二起崧亭十弟來迎至山行雜感止八十八首

三起晚至靜甯州至赴圓明園止九十五首

第十五 灤河于役集一卷自乙酉春至是年夏

起奉命赴東土默特讞案至大廟早飯止三十六首

第十六 鏡鷗寄懷集一卷自乙酉夏至是年冬

起過大樹庵至西方寺看凌霄花止九十首

第十七 西征解弢集一卷自丙戌秋至丁亥夏

起獲鹿道中曉發至小有餘芳即目止七十二首

第十八 秋曹讀律集二卷自丁亥夏至己丑冬

一起三官廟看花至贈汪茂才疊前韻止八十八首

二起坐江西司堂至媿蠶魚止九十首

第十九 詩舲酬倡集一卷

起和朱棣堂府丞詩至桃花寺止五十一首

第二十

陔餘近游集一卷

自庚寅春至是年秋

起偕汪茂才夜話

至秋窗感興

止九十七首

第二十一

輜車振遠集二卷

自庚寅秋初至秋季

一起赴綏遠城

至歸化城行館感懷

止六十首

一起綏遠城感懷

至晚抵胡家屯

止六十五首

第二十二

雁門迴轡集一卷

自庚寅冬初至冬季

起奉

旨赴陝

至還家坐自有餘書屋

止八十一首

第二十三

粉署趨承集四卷

自辛卯春至丙申春

一起元旦春帖子詞

至夜歸丙舍

止七十九首

一起天甯寺僧邀題

至峒筒

止七十三首

一起出宣武門詣天甯寺

至澹園西偏

止九十二首

一起西方寺賞凌霄花

至賦答汪少尉

止八十四首

第二十四 鳳池染翰集二卷自丙申春至丁酉冬

一起授內閣侍讀至青龍橋和查初白止五十九首

一起匯通祠至張氏印光樓止六十五首

第二十五 瀚海綏藩集二卷自丁酉冬至戊戌夏

一起賜賚土爾扈特至喜值學士寶綬止九十六首

一起曉發噶魯迪至官溝道中止九十四首

第二十六 同卿正莅集一卷自戊戌夏至己亥夏

一起陪祀方澤禮成至題卓海帆先生集止六十六首

第二十七 牧政再宣集一卷自己亥夏初至夏仲

一起奏請查驗馬羣至南口聞蟬止七十六首

第二十八 鵷班掌萃集三卷自己亥夏至壬寅春

一起夏日書懷至昆明湖晚眺止八十六首

二起長樓讀 御製詩 至聞九弟移督雲南 止八十五首

三起出崇文門詣張鴻臚第 止游臥佛寺 止七十六首

第二十九 三使均齊集一卷 自壬寅夏至是年冬

起赴察哈爾均齊馬匹 至清卿處儉感懷 止百二十八首

第三十 二臺供職集一卷 自癸卯春至是年秋

起新正四日喜雪 至恩授左副都御史 止六十五首

第三十一 陪都司寇集一卷 自癸卯秋至是年冬

起恩擢盛京刑部侍郎 至吉林行館書懷 止百一十一首

第三十二 雙城均賦集一卷 自癸卯冬至是年春

起赴雙城堡履勘官田 至過城東明堂村 止七十三首

第三十三 瀋陽還京集一卷 自甲辰春至是年夏

起調任刑部侍郎 至曉渡潞河感舊 止六十九首

第三十四

雲亭肯構集二卷

自甲辰夏至乙巳冬

一起

圓明園倬直

至贈濮又相

止六十首

一起

馬廠散步

至

送燕山弟之熱河都統任

止六十一首

第三十五

扈蹕延恩集二卷

自丙午春至是年冬

一起

出阜城門

至

迎陽半幅精廬卽席

止七十一首

一起

西淀散直

至

朱氏小寓挑鐙寫懷

止七十四首

第三十六

藏衛奉使集五卷

自丙午冬至丁未秋

一起

授駐藏大臣恭紀

至

夜抵霍州

止八十四首

一起

行抵洪洞縣

至

過雞頭關

止八十首

一起

出褒斜金牛峽口

至

新都道中

止六十八首

一起

劉燕亭廉訪諸人小集

至

曉渡雅龍江

止九十一首

一起

山行入老林

至

抵藏喜成

止七十九首

以上共三十六集分七十一卷統計詩五千五百九十一首
外眠琴僊館詞一卷附末

先仲兄少司寇公年譜

法良謹案家譜瓜爾佳氏隸滿洲正紅旗族祖信勇

公諱費英東公從龍遼瀋以戰功世襲公爵本生

始祖尼雅濟布公從入關康熙中從征畱駐防西安府

再傳至先叔祖吳勤毅公官總督始遵例移京旗

先曾祖考額公諱思圖

誥贈光祿大夫

曾祖妣覺羅氏

誥封一品夫人

生曾祖妣劉氏

誥封一品夫人

先祖考塞公諱得立

誥贈光祿大夫

祖妣輝和氏

誥封一品夫人

先考諱玉德字達齋號他山由考試內閣中書累官閩浙

總督

誥授光祿大夫

先妣韓佳氏

誥封一品夫人

繼妣郭洛羅氏

誥封一品夫人

先光祿公子六人長兄諱俊良十九歲而殤係韓佳太

夫人出

先仲兄諱斌良行二又行八字備卿又字笠耕三兄桂

良又行九字燕山由禮部員外郎歷官雲貴兩廣閩浙

總督現官正白旗漢軍都統俱郭洛羅氏太夫人出

四兄諱岳良又行十字崧亭由理藩院員外郎官江

西布政使護巡撫事烏什辦事大臣五兄諱徵良字

松垞由大理寺司務官江蘇常州通判俱庶母張太

夫人出法良由戶部郎中前江西督糧道現任江南河

庫道 生妣張太夫人出

乾隆四十九年甲辰公一歲

是年閏三月二十九日筮耕公生於京師內城細瓦廠故宅時 光祿公由濟東道降官刑部郎中

五十年乙巳二歲

八月公弟桂良生

五十一年丙午三歲

光祿公擢山東按察使公隨任 五月公弟岳良生

五十二年丁未四歲

光祿公調安徽按察使公隨任

五十三年戊申五歲

五十四年己酉六歲

公就傳從揚州程蘊齋師

維善

六月

光祿公升安徽

布政使十月擢刊部右侍郎公隨侍回京

五十五年庚戌七歲

光祿公奉

命赴湖北查辦案件

五十六年辛亥八歲

光祿公奉

命赴奉天各處查辦控案

五月公弟徵良生

五十七年壬子九歲

光祿公轉左侍郎兼副都統充

經筵講官奉

命赴直隸江西浙江查辦事件

五十八年癸丑十歲

五十九年甲寅十一歲

六十年乙卯十二歲

正月 光祿公授山東巡撫

賞戴花翎公隨任 十二月 光祿公兼署河東河道總督

嘉慶元年丙辰十三歲

六月 光祿公調浙江巡撫公隨任是年公 恩廕二

品廕生

二年丁巳十四歲

三年戊午十五歲

四年己未十六歲

公年十六詩已有成人風編詩自是年春日幽居始烏

程鄭夢白

祖琛

與公同庚時爲名諸生幕友江墨君

德

地之壻以詩來謁執贄爲弟子鄭公甲子乙丑連捷進

士由江西知縣現官廣西巡撫是夏公有和家大

人紫陽洞避暑詩十月光祿公署閩浙總督

五年庚申十七歲

正月光祿公授閩浙總督春三月公侍郭洛羅

太夫人還京有三十五郵亭詩八月娶夫人覺羅氏

雲貴總督琅玕公女十一月公弟法良生

六年辛酉十八歲

自己未至辛酉編南行北歸集是年正月光祿公

署福州將軍

七年壬戌十九歲

公廕生引

見授主事分太僕寺行走通籍自茲始編司馭觀政集有自嘲

詩

八年癸亥二十歲

九年甲子二十一歲

秋應鄉試同考官游彤白編修

光緒

閱薦未售

十年乙丑二十二歲

五月補授太僕寺主事充

實錄館纂修官

十月捐升員外郎

十一年丙寅二十三歲

七月補授

盛京兵部員外郎經

實錄館奏留以在京各部院員外郎卽補

夏

光祿公請告

回旗旋以海疆不靖被議落職 冬遣戍伊犁崧亭兄
隨往

十二年丁卯二十四歲

五月選授戶部浙江司員外郎 秋隨 成親王曹儷

笙尙書恭送

實錄至盛京有左民使潘集 十月 光祿公賞給三等侍衛
授烏什辦事大臣 是年正月長子延福生側室鄭宜
人出

十三年戊辰二十五歲

四月 光祿公因病

恩准回旗調理 公迎侍于陝西道中十二月出京 是年有
望雲陟岵集 光祿公於十二月卒於甘肅之涼州府

十四年己巳二十六歲

正月 公經豫州旅次書懷有八齊全韻詩行至陝界
與燕山仲兄崧亭叔兄同扶 光祿公櫬于三月至京
冬十月葬 光祿公暨元配韓佳夫人於良鄉縣之
臥龍岡

十五年庚午二十七歲

百日服除仍官戶部

十六年辛未二十八歲

春服闋 五月補授戶部雲南司郎中 七月長女生
後適原任尙書昇勤直公子辛丑進士兵部員外郎寶
珣

十七年壬申二十九歲

是年兼本旗公中佐領 掌陝西山東福建等司印鑰
管理飯銀處捐納房督催所八旗俸餉處

十八年癸酉三十歲

九月滑縣教匪李文成爲亂十月公隨大學士托公津
開州軍營防堵辦理文案事件十二月滑匪平

賞戴花翎 是年三月覺羅夫人卒 十月側室鄭宜人卒

十九年甲戌三十一歲

五月隨同大學士托相國通州查辦事件 十月奉

旨前往山東隨同大學士章煦查辦事件是年 京察一等奉
旨記名以道府用

二十年乙亥三十二歲

二月授山東兗沂曹濟道 三月之任

二十一年丙子三十三歲

四月續娶博爾濟吉特夫人爲文秋潭相國姪孫女筆帖式訥公女 冬山東陳笠帆預撫部以公不諳河務請改歸地方道員奉

旨改調江南候補道

二十二年丁丑三十四歲

正月至濟甯回充勘苗陰平有詩有至濟南畱別詩自甲戌冬至是春爲齊魯按部集 三月南下夏至江南至蘇復至白門七月補授蘇松常鎮太督糧道八月之蘇之常熟履任 自是秋以後有句吳轉漕集九卷

二十三年戊寅三十五歲

四月督運北上六月抵京十一月回吳

二十四年己卯三十六歲

閏四月督運北上六月抵京十一月回吳

二十五年庚辰三十七歲

三月督運北上五月抵京公以三運任滿引

見又以到壩較早倉場總督那文毅公以速漕利運保奏奉

旨交部議敘七月奉

旨升授陝西按察使十八日出京八月抵陝九月調補河南按

察使十月之任是秋七月

仁宗睿皇帝晏駕公秦中畱別詩有馬首東馳行未到 龍髯

北狩慟難攀雲霄 黼展頌 新綈冰雪關河鍊舊顏

之句

道光元年辛巳三十八歲

公爲撫部所劾十月奉

旨著來京以四品京堂候補 是年延福 恩蔭七品官引
見以光祿寺典簿用

二年壬午三十九歲

三月補授太僕寺少卿 十月次女生後適一等侯散
秩大臣瑚圖禮

三年癸未四十歲

五月次子慶福生爲傅孺人出 九月隨扈 西陵圍
差奉

旨充管道大臣

四年甲申四十一歲

四月奉

命赴察哈爾那林果爾查驗馬匹廿五日起程五月至其地編
開平考收集音圖寫望有立馬高吟神更王二千載內
第三人之句蓋地卽商都遺址唐宋以來詩人所未到
惟元遺山薩天錫采諸風詩耳六月初七日還京復

命七月初奉

命青海致祭湛巴拉多羅貝勒九月七日致祭札木巴拉多爾
濟貝勒禮成編青海紀行集有擁劍傳杯雙闔鎮帶刀
行炙十名王之句十一月還京復

命十月三子崇福生傳孺人出

五年乙酉四十二歲

二月奉

命偕兵部尙書松公

筠熱河都統那公

清安三座塔查辦事件

四月東土默特讞案畢還京編灤河干役集 九月三
女生後適軍機章京吏部筆帖式文琇

六年丙戌四十三歲

七月

賞給頭等侍衛

命馳驛前往哈什噶爾軍營辦事先是理藩院書吏包安泰安
和來見據鈔錄檔案逆裔張格爾之叔阿布都哈禮在
京潛住恐有鉤結情事公愬愬就道未及具奏行抵保
定繕摺交直隸總督那文毅公轉奏甘肅道中奉

旨撤回十月抵京以陳奏遲延不合被議奉

旨以六部郎中降補編西征解駁集有紀事詩十二首 四月
博爾濟吉特夫人卒

七年丁亥四十四歲

三月選補刑部廣西司郎中

八年戊子四十五歲

十一月四子錫福生傳孺人出

九年己丑四十六歲

正月兼攝內務府六庫郎中

十年庚寅四十七歲

充刑部律例館提調官 七月偕松湘浦尚書赴綏遠城讞案八月至其地烏拉特部舊屬三公管理先是札薩克中公車楞旺楚克多爾濟重斂苛虐其下經協理台吉圖斯拉克齊車楞敦多克密都布約七十餘人聯名訴告正盟長西公巴圖鄂齊爾副盟長東公拉特那

巴拉積不能容旋奏削中公札薩克印正盟長交理藩院議其印改派副盟長拉特那巴拉代治之九月事畢胡家屯道中奉

旨隨赴山西讞案十一月并門勘事畢十二月還京八月長

孫萬泰生

延福出

是春徧游近畿諸勝有陔餘近游集

秋冬有輜車振遠集雁門迴轡集

十一年辛卯四十八歲

是冬暢游西山有戒臺古松歌諸作十二月郭洛

羅太夫人卒

十二年壬辰四十九歲

居憂守制于天甯寺百日孝滿仍任刑部郎中

十三年癸巳五十歲

十一月韓太夫人于良鄉祔 光祿公之塋

十四年甲午五十一歲

三月服除

十五年乙未五十二歲

掌山東江西山西廣西等司印鑰

十六年丙申五十三歲

二月補授內閣侍讀學士

十七年丁酉五十四歲

二月奉

命偕安上公至土爾扈特

賜奠多羅札薩克郡王三達克多爾濟初六日出京 六月五

子岱福生傳孺人出

十八年戊戌五十五歲

正月過烏里雅蘇臺 二月初九日致祭禮成 是月
土爾扈特回車 三月沙拉哈達道中得

旨升太僕寺卿四月初三日還京復命

十九年己亥五十六歲

四月奉

旨察哈爾八旗查驗馬羣 五月下旬事畢還京有牧政再宣
集 七月侍姬蓉娘宋氏卒悼之有詩

二十年庚子五十七歲

五月次子慶福入庠 延福以光祿寺典簿艱得缺
奏改筆帖式

二十一年辛丑五十八歲

十一月四女生

二十二年壬寅五十九歲

四月奉

旨赴察哈爾均齊馬羣六月初還京有三使均齊集 十二月

補授通政使司通政使 四月三子崇福入庠

二十三年癸卯六十歲

七月補授都察院左副都御史 閏七月補授盛京刑

部侍郎八月抵瀋陽任 九月奉

旨赴吉林審辦德吳氏西高氏京控三十三款之案十月抵吉林十一月赴雙城堡履勘官田清釐倚勢佔晌抗租將所控之員弁旗民等分別定擬治罪又奏言京旗苦累設法拯救蓋雙城堡在萬荒之中糧不能遺售而價賤

所得三十晌熟田糧十五石僅售京錢七千五百卽數口之家亦無以爲一歲之資請

旨以現年租項八千餘串內

飭下吉林將軍以六千串爲六百戶旗丁之生計復以三屯公所閒荒八千餘晌丈量畝數分給各戶務使地無餘利人有餘財以副 惠養駐丁之至意有雙城均賦集

十二月還瀋陽

二十四年甲辰六十一歲

二月奉

旨調任京刑部侍郎 三月起程遊歷巫閭山有詩 四月初四日還京 先光祿公亦任少司寇公編有雲亭肯構集 是年偕岫貝子考試 盛京宗室 次子慶福以

筆帖式分理藩院行走

二十五年乙巳六十二歲

四月兼管廂紅旗漢軍副都統 八月閱六旗大陣閱

廂紅滿洲蒙古漢軍三旗六營大操 九月仰山窪八

旗大閱 三子崇福以筆帖式分兵部行走 十月次

孫長泰生

崇福出

二十六年丙午六十三歲

三月扈

蹕謁

陵奉

旨充管道大臣 十二月以副都統原官授駐藏大臣 是年

四月延福陞授光祿寺署正

二十七年丁未六十四歲

正月八日

陛辭

上諭以脩好達賴喇嘛循俗藉撫番眾並隨時訓練兵丁慎重
邊防各事宜 二十八日出京次子慶福隨行 三月
六日登華有詩 四月十五日到成都 五月初一到
鑪定橋 六月到乍了奉

旨審乍了二喇嘛互爭一案 七月十六日抵前藏編藏衛奉
使集五卷有公然一萬三千里默佑平安佛力宏之句
是時公甫抵藏已不服水土得疾故廢吟咏蓋絕筆於
是矣 先是額魯特弁兵不法屢侵占唐古特民人復
抗調不赴沃欲營盤操演經掌辦商上事務阿齊圖諾

們罕率同僧俗稟請攻剿公抵藏奏言不法者無多無
出巢焚虜重情未便良莠不分遽加攻剿當卽出示曉
諭咸知悔罪遵令惟誅其尤犯法者降巴等六人交噶
布倫投諸遠荒以絕煽惑邪說之根株而邊圉已靖又
唐古特西界推噶爾本營官稟報有披楞所屬庫魯部
落遣人投遞披楞兵目薩海夷稟一件喚夷欲向西藏
請定界址通商經前任駐藏大臣代營官致書覆去尙
無回音 九月

廷寄至示廣督所奏夷酋情形公奏言披楞邊界距後藏四十
九站八月雪卽封山度該夷今年不能卽至此時安謐
如常如夷信覆到固不敢孟浪從事致啟衅端亦不敢
輕爲然諾轉滋貪念惟有密加偵探相機籌辦以副綏

靖邊陲之意 十一月十九日 卒

法良謹按 公卒後遺摺到京

上嘉悼久之

加恩照都統例賜卹

准入城治喪應得卹典該衙門查例具奏恭頒

御祭文一道 二十八年正月二十八日 公柩自藏起程八

月十六日抵京遵

旨奉安 靈柩于舊第 二十九年延福等卜地于京城東直

門外大興縣單店村四月二十七日與覺羅氏夫人博

爾濟吉特夫人合葬焉并附誌于此

抱冲齋詩集卷一

長白 斌良 笠耕

南行北歸集一

春日幽居

繞屋團雲樹幾行
市聲吹不到書堂
雨多礎蘚微微溼
風澹庭花冉冉香
半日怡欣來客少
六時不厭賦詩忙
畏人小築溪南室
誰向空門學善藏

白牡丹

玉作精神錦作團
肯同凡卉鬥寒酸
白衣宰相珊瑚骨
風格須從澹裏看

大鏡

八尺琉璃似水融
蟠龍四角簇花紅
試看背面原無物
不信中

心本是空肝膽蓄私難獨揜丰姿絕世亦堪同始知惟有虛能
受任爾縱橫萬變通

書鐙

蟾沒林端螢滅囊一枝桂蠟續昏黃芸窗紅憶當年影藜閣青
分此夕光牆角有人悲棄置案頭無語閱興亡未能消得中心
熱相對同支靜夜長

敬和 家大人紫陽洞避暑詩

杭城襟山帶湖節署面仁皇山山綿亙十數里有紫
陽洞林壑竒窳炎曦所不及洞側建紫陽書院月課
時余得侍游講堂後饒園亭之勝焉

萬瓦魚鱗占上頭竹深古洞足清游偶來駐節舒吟眺山色湖
光一望收

講堂突兀在山頭
撰杖尊前得侍游
濂洛文章班馬賦
英才夾袋一時收

一樓

一樓高與野雲平
風勁松濤鳥下生
默處心情覺惆悵
乍寒天氣益淒清
山形漸露本來相
木葉亂飄空際聲
茗熟香溫吾分足
安排鑪火待冬晴

小樓獨坐頗得閒意因題一律

酒闌香燼客初還
坐擁琴書靜掩關
風定有時聞落葉
窗虛恰好面寒山
本無重責何妨懶
不是才人只合閒
賸得新詩百回讀
每逢佳處動心顏

聽雨樓夜讀

循牆夜柝報三更
瘦影如山倚百城
千載事功歸夢幻
半樓鐙

中江先生集卷一
川野人 二
火照書聲麝煙滃室不知冷蟾魄掠窗偏有情最是奚童解吾
意脣焦時節茗初傾

田園雜興

補就蒼茫大化工培成淺碧間深紅秋花開處如人意石隙蕭
疏綴幾叢

寂寞幽齋似子雲牆頭鸞尾散繽紛東家竹讓西鄰看秋色何
妨與共分

雲皴幾朵太湖青繞向幽窗作畫屏怪石也應愁獨立翻教翠
蔓襯瓏玲

簾波垂處望如煙嫩日烘晴竹樹妍狂蝶迎風飄不定笑他錯
認豔陽天

萬卉芬菲要及時朝葵暮槿總參差婀娜惟有牽牛性不許看

花客到遲

每緣習靜感升沈
差作寒郊瘦島吟
蟋蟀那知人意懶
夜涼苔砌訴秋心

折葦殘荷沒遠津
波澄無復溼鎔銀
青萍吹破天光見
時有游魚露錦鱗

蓬蒿掩砌竹成窠
開徑欣逢二仲過
翦韭畱賓惟一簞
泥人風味不須多

課雨量晴意自恬
瓜疇來熟漸無嫌
歸來妻怪犢禪溼
一笑始知清露霑

平生心事野鳬知
半在蒼茫獨立時
誰解田園好風物
鷗波粉本石湖詩

古意

冬日每苦短夏日又苦長天時猶莫定人事固難量
羞爲霍家奴不作田蚡客一意任孤行吾意自有適
胸中蘊心兵吐氣光豔豔大勇者不爭何須佩長劍
慕勢歡易竭尙義交不渝金或有時盡道不離須臾
誦讀陶我情閱歷識世態可憐憫懂人徒賸形骸在
樹頭黃栗畱啁哢多煩聲不如老鶴鶴一鳴人輒驚

武林曉發

漸聽雞聲歇舟行發榜齊春雲連樹暗落月挂帆低
估客爭朝市漁人唱曉溪餘杭山色好遙指畫橋西

看花

筇近清明別古杭看花千里過江鄉南風輕逐行人北
卻訝春光爾許長

道上見楊花榆莢各成一律

驛路東風春又殘
垂楊飛絮漸漫漫
一隄煙重人黏屐
滿店香吹客卸鞦
好共綠蕪增點綴
莫隨紅雨便闌珊
長安花事慙慙甚
到及濃陰滿眼看

清明曾記散榆煙
細莢叢生色更鮮
客路襜帷腰下帶
酒旗邨落杖頭錢
輕翻澹月垂垂白
併散疏星箇箇圓
數徧連番花信後
風光早是送春天

塘棲道中

百里春潮客夢遙
宵來酒力未全消
多情最是江南柳
古驛郵亭萬萬條

姑蘇口號

採香響屨故吳都
此日風流得似無
岸上歌郎船上女
生來只

慣住姑蘇

江中望金山妙高峯

獨有妙高峯崔嵬復此逢
半空落金碧孤柱削芙蓉
鈴語因風墮濤聲帶雨春
昨來登陟處猶記路重重

登金山懷古四十韻

形勢雄天下河山兩界多
雙峯森砥柱一棹撥晴波
疊級盤空上危檣拂檻過
飛丸跳日月高浪駕鼉鼉
陡覺層霄迴應知列宿羅
下方看若此上界竟如何
紺塔翔金鳳銀盤湧碧螺
堞垣排似櫺樓櫓疾如梭
蹴浪江豚走凌霄健鶻摩
崇樓薄雲漢絕頂臥陂陀
奇勝開仙境登臨發浩歌
西津波渺渺北固岫峩峩
濤湧千巖疊潮平一鏡磨
金陵遙作塹鐵甕近連渦
眺遠真無外歸墟自有沱
煙霞喧梵唄風雨老漁蓑
卽景情俱壯遺蹤認

不訛人文追北宋儒雅首東坡詞曲忠彌摯禪機法近詩弼魚
塵慮淨歌扇醉顏酡事往畱碑碣朋來訪薜蘿帶圍憑想像詩
版共摩挲更憶中興將曾麾北伐戈英名垂史冊駐節此邱阿
戰鼓轟蛟鱷軍容列鸛鵝捷書磨盾草犒酒背鬼馱壯志期殲
敵先聲喚渡河儻從馳鐵騎庶不歎銅駝生角嗟羈馬傷心竟
跨羸旌旗追杳渺苔蘚自髭髥膺有精藍在端憑神鬼呵銀濤
喧竹徑翠蓋蔭松柯傑閣檐飛鵲穹碑字負蝌來遊歌緩緩笑
傲舞傴僂海日迎波煥春風拂面和氣蒸雲鬢雨泉漱石橋莎
四下空無際中蹲勢不頗恍疑飛鷲嶺大可壓鷹窠澎湃思金
鼓鏗鏘想玉珂快游此爲最天外落吟哦

登甘露寺絕頂

忽看天塹分南北頓覺平生眼界超峻嶺西盤開楚越大江東

下鎖金焦崇樓危堞思三國疏柳斜陽送六朝欲問蘄王酣戰處無邊蘆荻自蕭蕭

游高明寺

問訊高明寺名藍到未曾山花扶客屐徑竹透禪鐙流水數聲磬夕陽何處僧我來參妙法若箇是南能

維揚夜泊

柳煙斜漾短長條夜泊維揚郭外橋歸雁一聲殘夢斷漁鐙紅處雨瀟瀟

邵伯道中

嫋嫋沿隄柳東風一道斜纓煙茅作屋罾網水爲家吳舫歌聲緩燕雲客路賒忽看雙燕影春色又天涯

晚抵淮陰

蒲帆十幅波蕩搖江南江北風蕭蕭船頭撾鼓報暮潮危檣突
兀高建標雄城百雉峙岩巖沿隄鐙火金萬條揭來雨澤靜風
颿葦扉蘆屋歌且謠春江一葉蕩盡燒淮山岌岌波迢迢英雄
當日混漁樵一飯曾恩諸母漂自漢迄今時代遙何處重尋脰
下橋招搖在上斗指杓涼風吹衣身飄飄無將軼事詢芻蕘楚
漢分鼎紛蟬蛸長笛一聲起吳舫浪花如雨珠亂跳漁歌四應
破寂寥激石林木鳴刁刁行人夜起斟百瓢一醉能令萬慮銷
平明櫂歌發喧囂淮南落月還相邀

清江口

撥藍一道是清淮翠滴垂楊驛路牌行徧江南又江北兩三蘆
屋便成街

瀟瀟風雨灑篷窗角酒爭塵興不降兩岸波光搖不定落花如

夢到清江

一髮青山雨意凝
平橋水漲落魚罾
布帆安穩人無恙
到此方欣彼岸登

王家營題壁

歷數黃河北長亭
復短亭路遙初整轡
人靜尙聞鈴積雨連邨
墨孤鐙獨夜青曉來雲氣散疏柳帶殘星

過眾興

東風料峭送征驂
歷盡崎嶇興轉酣
拂面柳絲情繾綣
泥人燕子話呢喃
當壚爭貰村前酒
褰幔間招雨後嵐
帆影歌聲隄外路
風光依約大江南

題桃源驛

西湖回首暮雲賒
滾滾車塵一路斜
又是清明好時節
桃源古

驛看桃花

蘭山道中喜晴

假道琅邪郡，嶽崎亂石紛。
茅檐初過雨，山麓暗收雲。
叱犢喧春野，驅車碾夕曛。
泉聲流不住，隔嶺尚云云。

騾車渡水行

自鍾吾驛至紅花埠，百餘里積水載道，車行甚艱。起而復蹶者數四。古行路難，所云天荆地棘者，洵不誣也。賦此以當謠諺。

郎當鈴鐸鍾吾驛，積窪汪洋成水國。
兩騾躑躅踏空行，車輪三尺泥五尺。
問路倉皇從田父，喧虺又陷道左澤。
片時出水得暫安，十步一溝五步洫。
車中砢砢一儒生，簸揚若舉空中翼。
古來舟車各殊用，泥輻山標分轍迹。
如何陸行忽逢此，雙輶聊當揚。

帆船耳中澎湃波浪聲眼前激灩空明色篋應譜公無渡山
鳥盡呼行不得無奈馳驅各有程中途那能遽休息騾兮騾兮
聽我言乘危詎忍加鞭策竭汝平生報主心加汝芻豆潔槽櫪
驅汝前行宜自慎是中深淺當潛識可憐騾亦解人意山立四
蹠增俊特支撐奮迅隨水宜浪花高蹴波紋激忽焉一蹶墮深
阡水沒腰腹惟見脊踰溝愧遜樊須賢出淖誰負藥鍼力日落
煙暝不見人夜半深池更惶惑奪策一呼力疾前車下但聞聲
汨汨墟煙燈火望前邨心旌搖搖兼欣感人語嘈雜到店遲啞
然失笑手加額題詩長歌行路難嗟爾南北紛紛客

別紅花埠小館

風塵努力自加餐茅屋三椽自在寬纔踏落花尋館舍又攜殘
夢上征鞵江南煙月供詩料淮北山河壯客觀沂水岱雲知不

遠興狂到處覺心安

堞莊和中山使者李墨莊壁閒韻

後溪纔了又前溪石路高低日漸西念我北歸同旅雁憐君南
去聽潮雞煙迷墟市人初散春到空山鳥亂啼儻過閩江叩鈴
閣爲言今日入青齊

羊流店相傳以叔子得名因紀

殘碑墮淚太倉皇異代風流尙紀羊百里好山青未了潞陽何
必讓襄陽

偶見

輓轡轉處水粼粼飲馬投錢迹已陳試向車前徵往事仲山去
後更何人

渡汶水

漸車渡汶水駿馬自蕭蕭流水去無已客心相與遙炊煙低屋
角晴旭界山腰鄆謹田誰問春風徧麥苗

車上四詠

篷

彷彿扁舟似車篷紫縛初半窗招黛遠一隙透風疏只合低頭
入還宜跌足居勞勞行役客高枕卽吾廬

幔

居然分內外小幔翦青縑差比障塵扇應殊窺月簾高舉山露
髻斜掩塔藏尖何異下帷士終朝好句拈

旗

尺布殷紅色爭將官閥標聯行真可數失隊卽堪招測暑憑竿
正占風驗腳飄結旌何敢擬檐外獨搖搖

鞭

辛苦服衡馬鞭箠爾許長數聲驚曉夢一綫劃斜陽銅骨揚時
奮銀蹠著處忙爭先復何益戒勿使重傷

道旁八詠

驛

何處尋荒驛蕭條屋數間尺書飛騎疾雙節使星還亭長俸誠
薄馬曹官不閒恩恩迎復送不敢掩柴關

鋪

平沙望無際突兀成樓高半面窗間盾雙鉤壁上刀梆聲宵橐
橐鈴語日勞勞土櫓寒消燧時平偃六韜

市

小市風塵外門前映綠楊趁墟當午鬪爭市浹辰忙偶值三春

節居然百貨場須臾交易退人影亂斜陽

寺

不知何代寺日午未聞鐘旛動當風影金殘滿月容斷碑荒草
臥古樹積塵封仙佛甯棲此飄飄天外峯

柳

古道鬢鬢柳春風一色青折來南北客蔭徧短長亭置酒人初
別沾衣樹有靈應憐車上士役役尙勞形

草

歷盡風霜後春殘綠始回步憐雙屐穩踏畏四蹠摧原上低青
靄窗前護碧苔一般生意足獨此受塵埃

轍

轍迹環天下橫衰一綫通淺深千里別廣狹九達同細雨蹠涔

外春風驛路中馳驅徧南北隱隱望無窮

塵

素緇忽改色滾滾道中塵向日初鞭馬迎風不見人只緣紅十丈辜負綠三春稍喜宵來雨遙山入望新

旅食八詠

餅

說餅過邨店斜陽匿未曾蒸誰誇十字厚訝疊千層枵腹填應滿殘牙嚼未能轉詢曲江上已否縛紅綾

粥

到處粥於是深憐紅黍紅那能春一斗聊復啜雙弓齏冷昔傳范豆香今憶馮解飢兼解渴消受瓦盆供

豆腐

乃與吾儒稱晶瑩似截肪調羹須及熟作膾更宜涼久襲淮南
號偏從趙北嘗來其有同嗜頻問爾邨莊

火酒

釀雪纔涓滴堆花恣拍浮值廉思滿酌性烈莫輕酬霜重人離
店風高客到郵何須覓紅友卽此是青州

蔥

寸寸斷蔥白曾從漢史聞熟嘗脂更滑生陷氣潛熏富欲誇三
畝香堪壓五葦風霜行道客每食定思君

韭

堆盤剛十八二韭笑畱題翠帶千莖結銀刀一寸齊剪從寒雨
圃摘憶早春畦薦食相因久何如搗作齏

雞卵

渾沌猶未鑿遠爾薦賓盤勢比伏雛易情殊探轂難團圞方去
殼渾脫似彈丸肉食幸無鄙纍纍滿眼看

大頭菜

既異元脩脰還殊諸葛甜芋魁慚比大菱角笑磨尖佐食宜成
縷調羹不用鹽伊誰論滋味獨把菜根拈

羸車謠

一坡復一坡坡山石多努力不得上羸兮奈爾何
短鞭捶羸面長鞭捶羸腹捶面勿傷眼捶腹勿傷足
下坡力在前上坡力在後殷勤護主心車中人知否
朝秣日未升夕秣日已落辛苦不能言聊藉聲聲鐸

車中作

春風來無際百卉齊作花好鳥鳴空林嚶嚶亦堪嘉萬物貴及

時此理良非賒少壯不自勵衰老徒咨嗟緬想古賢達三倉復
五車經訓既紛綸箋疏勤梳爬上下三千載結願豈云奢譬彼
耕耨夫豚蹄祝污邪秋收在春作石田奚爲耶陽和一朝至郊
原燦如霞時乎不再來努力愛春華

度嶺

驅車越重嶺一步一奇境馬口銜馬尾人尻接人頸一髮引千
鈞纏纏紛垂綆上如猱升木下如蛙墮井巨石擊雙輪轟然聲
何猛鐵石兩相磨積久凹成皿纔脫後巖危悶極方思騁前峯
迎面起一綫路牽絙入險容惟巖出險氣尙屏坦焉履平地中
心恆自警回顧雲重重斜陽漏殘影

過泰安嶺

車行泰安嶺轍迹如蛇行青山背復面白雲低旋昂屈曲更屈

曲四顧生傍徨危石高露骨飛沙積成隍率爾爭捷足輪摧馬
卽傷後車山之北前車山之陽東盤復西走輾轉環高岡不覺
陵絕頂天風吹我裳欲認來時路俯視心茫茫高下不能辨但
見塵土黃何必九折險卽此是羊腸

渡沂水

征車隨春風邈迤行復止駕言問清沂中流石齒齒深厲淺則
揭羨彼褰裳子流水本無我客懷澹如此渺焉發遐想點也古
狂士風浴暢天機冠童偕水涘疇謂曠達情不蘊淵微旨我來
值春莫兩涯紛紅紫臨流詠歎聲千載猶未已今心窺古心視
此清清水

望道上諸山

無緣著屐踏崔嵬但見黃塵滾滾來一角吳山宵入夢綠陰如

雨滴蒼苔

出山

崎嶇萬疊曉煙昏雲外雞聲別有邨
何意東風忽吹斷平沙渺渺望無垠

店中四詠

牀

暫息風塵駐市旁晏眠差喜漏初長
客程莫問東西路旅館誰分上下牀
明月一痕輦作障寒風三面土爲牆
宵來襆被恩恩甚曉色朦朧又戒裝

鐙

孤館青鐙最繫思藉他伴我宿茅茨
頻挑游子天涯夢徧照離人壁上詩
撲盡飛蛾知夜永瞰來飢鼠恨眠遲
春前記否書窗

下梅影橫斜三兩枝

析

夕陽沒處卸征鞦閣閣蝦蟆叫戍闌羸馬雄關人半度荒雞野
店夢將殘三更敲落西牆月五夜催殘北牖寒最是勞人嫌聒
耳客中高枕未能安

槽

吻敝蹠傷乃爾勞黃昏始見馬騰槽束芻自昔曾推穉刳薦何
人更繼陶側耳長鳴風力勁拳毛初動月輪高終宵飽食真無
媿詰旦長征氣更豪

獻縣懷古

秦政讎詩書斯文固盡喪六經付劫灰天地爲惆悵漢興近百
年猶未端趨向後除挾書令稍稍事搜訪屹屹諸老儒辛勤歷

萬狀古壁聞絲竹空庭肅穆豈惟時獻王賢經義寶提唱登高
而疾呼四海羣瞻仰遂令女子微亦解護珍藏美哉虹玉文歸
然幸無恙我今過舊邨懷古神偏王溪毛薦何處又復中情愴
惟王在孔門元功固無讓實從三代下力追三代上嗤彼八斗
才感甄徒怏怏

望景州塔

望中孤塔故陵嶠何計題詩最上層此去皇州千里近自來詞
客幾人登天臨河朔風雲壯地控燕齊氣象增鈴語分明說清
淨道旁車馬日奔騰

惆悵詞

朝霞東向紫暮霞西邊紅恨卿何薄倖朝暮忽西東
蓮葉綠田田蓮花紅的的何處可通辭盈盈一水隔

妾情若楊枝郎情如柳絮楊枝終古垂飛絮知何處

自題謹靜室

反舌生全天深愛無聲益栖遲幽谷裏飛止愜所適吁嗟白鸚鵡能言遭弋獲雪衣繫綵絲金籠鍛綺翮微禽通奧理暇日深撿擇從來言與文早爲世指摘會心茲不遠謹靜理須核靜默慮捐萬謹敬憂失百守中數不窮老聃垂竹策動昧智慧珠敦艮載周易結茆傍山麓於焉度朝夕谷深息羣籟廊空絕響屨臥聽風折筍坐視雨漂麥寂寞子雲居蓬蒿仲蔚宅囊括通琴心觀摩有圭璧休沐載寢興用以顏諸額

曉起

曉起望林皋朝煙靄喬木幽人策杖行繞彼山之麓都無塵紛染誰受清淨福緬想古賢達晤言在空谷守眞如抱璞深藏似

韞櫝無心偕束帛轉愛友麋鹿戛然涼風生長松鳴謖謖矯首
見西山羣峯入雲躡黛色照眼明豈殊垂青目不若世俗交雲
雨常反覆蒼翠欲滴衣嘉卉散芬馥人皆歎閒居惟我愛幽獨
何日住峯顛數椽結茆屋

自抱冲齋步至池上

風入虛堂涼霜飛秋易老何物亂堆門落葉紛未埽信步池上
行瘦影浸寒潦鷗飛驚避人魚潛亂依藻水底天光闊樓臺訝
俱倒匹練寫秋光清景開懷抱時已踰烹葵樹尙餘懸棗有時
枕石眠有時據梧槁閒居得真樂知幾須及早

雨中赴西淀卽景二十韻

普潤周原廓飛甘禹甸遐雲頭濃似墨雨腳細如麻溜急穿青
渚橋低擁白沙畝閒唯臥犢城曙未聞鴉路滑行看轡泥深漸

沒車人煙亂蒲柳鷗鷺宿蒹葭磯表行彌遠村連景倍嘉遙看
煙一抹莫辨路三叉帘影垂垂亞溪流處處斜陌旁初落絮樹
底尙餘花水地偏宜稻陽坡半種瓜魚標新漲沒螺髻斷雲遮
徙倚疑蒼雪清幽儼若耶爲耽風物好不厭道塗賒瞥眼離塵
市回頭換物華棼橈盤樹杪金爵翼檐牙禁苑春常鎖宮門靜
不譁苑桃紅夾籞官柳綠排衙飲鑿時何阜豚踈祝太奢賡歌
徧朝野

帝德盛無加

雨

雨滿平疇農望慰泥深野店客心驚田歌歡喜行歌苦一樣春
霖兩樣情

晨起口占

露斂晴空少片雲
曉來庭院靄清芬
拈花妙諦誰參得
蘼蔔香從鼻觀聞

曉出西郭

暫攜襪被一囊輕
侵曉城西策騎行
細葛迎涼初澹蕩
薄雲釀雨半陰晴
黃蒿綠篠畦邊合
白塔青山樹杪橫
欲訪來青亭子畔
煙巒深處聽秋聲

中秋夜同吳澗尊會貫登樓小集

月不易團圓
人生幾度看
一杯邀友共
百尺倚樓端
天籟靜中得
冰輪空外寒
夜深風露冷
高處怯衣單

吟詩

錦繡胸襟冰玉容
放懷期與古人同
律如雪藕抽還細
句比黃金鍊始工
艱苦盡諸思縮手
津梁初濟欲爭雄
蕭齋鎮日支頤

坐收取風花向碧筒

墓廬晚眺

到眼清光處處同
嘉禾未穫圃場空
塔鐙明滅秋林外
山影微茫暮靄中
滿徑白楊眠石馬
一天涼露咽莎蟲
秋墳閒咏無人識
瓜架清談聽老翁

九日黑窰廠登高寄崧亭四弟

岳良

兼懷吳澗尊明經

萬里臺邊落照黃
偶然登眺轉茫茫
桑乾浪急翻龍窟
榆塞風高起鴈行
海國鯨鯢波已靜
天涯兄弟意難忘
愁帷爲道秋來健
旌旆何時返

帝鄉

驚心節物感無窮
浙水燕關悵望同
九日雄風堪繫馬
三秋積潦託飛鴻
蘆花湧雪千重白
柏葉烘霞一抹紅
欲問幽懷寄何

處來青山色暮橫空

游萬壽禪寺

掉頭閒詠繞花塍欲出還迷興益增詩境生於未經路宦情淡
似退歸僧長松翠隱亭三面蒼蘚青分石幾層蓮社久荒春寂
寞瓣香獨自禮南能

秋日游釣魚臺

非魚我卻知魚樂鎮日相看不下鉤釣艇每依花港曲香車多
傍版橋頭白波斷處青山見綠柳疏時畫閣浮莫向荻蘆深際
望西風蕭瑟野塘秋

送吳澗蓴歸里

纔攀官柳便傷神三載相於倍覺親簡略愧稱東道主切磋終
望老成人清標處世鬚眉古直道論交契誼真切莫語兒溪畔

住水雲深處寄吟身

題採蓮扇頭

長隄一帶水盈盈風拆珠盤瀉露輕卻怪雙飛波外鳥生來見
慣不知名

昨夜涼颺到霄茗菱花七尺漫相驕儂家自有澄波鏡新月眉
痕著意描

姊妹相呼溪上頭早涼天氣是新秋生憎九曲門前水慣送飛
花別處流

亭亭翠蓋影婆娑一葉舟輕急似梭是面是花渾莫辨教人何
處託微波

路轉橋迴笑語微蓮花如面亦如衣小姑凝絕前溪去貪看鴛
鴦未忍歸

蘋花細細蓼花疏
羅袂輕颺玉臂舒
悄自臨波憐影瘦
所思何處寄雙魚

秋日寄懷友人

木落聲蕭蕭
秋風動四野
言念孤征客
碌碌何爲者
雲歸倦鳥還
日暮牛羊下
男兒志四方
轍迹徧九夏
何必抱琴書
庇寒乞廣廈
頻年好交游
託足地誠寡
結納管生金
得失塞翁馬
勸子急歸休
衷情心獨寫

除夕

三百六旬數消磨
臘此辰燭燒寒臘
盡齒邁歲華新
菜脔辛盤味
醅香小甕春
那堪風雪裏
投刺客來頻

同懷弟法良校刊

男崇福謹校重刊